

# ZION THUSUAK



**REVIVAL CHURCH OF GOD (RCG)**

Vol. XXVI

DECEMBER 2022

No. 136



**THUPI:**

“Chungnung pen ah Pathian chu, lopi takin um hen la, lei chung ah a dawisak ma ma mihingte kiang hin, chamna um ta hen! atiu ah.”

*Luka 2:14*

**Editor: Rev. Dr. Khupkam Vaiphei**

# ZION THUSUAK

**Editor:**

Rev. Dr. Khupkam Vaiphei

**Associate Editors**

1. Rev. Liante
2. Rev. Ngulneipau

**Contributing Editors:**

1. Mr. Kh. Sang Vaiphei
2. Rev. Kailum

**Board Members:**

1. Upa Mangkam
2. Pro Pastor Lianboi

**NOTICE**

Zion Thusuak article zosia hi thugin lam thu ah editorial board ten maw pawkna akinei puan, article hun piate mawpuakna ah kawi ahi ziakin dawtnawp a um chun, amau dawtzawk dingin ka hun genchian uh a hi.

*By: Editorial board ZT*

**A SUNGAH THU UM TE**

	<b><u>Page No.</u></b>
1. Editorial	01
2. Pathian Thutiam Hung Guitun Dan (Christmas Message)	02 – 07
3. Aw Ei Hil in Vangam Umdan	07 – 10
4. Khawvel Hukhin Na Ding Ah Siamtil Apat Pathian Nasep	11 – 16
5. Khristmas La Mang Kha Ta Em?	16 – 18
6. I Lakun A Hung Umta	18 – 23
7. Elected Upa Training Report	24
8. 2021-22 Kum Sunga Sepna leh Promotion Muthak te..	24 – 25
9. Pauchapna Hiatding	26
10. Hetsakna	27
11. Zion Thusuak Magazine Agent List	28

*Editorial...✍*

*Kum 2022 kumtawp lam December tha hung tung kit thei ta ah damna ei piau va eipuitung tu Pa Pathian chu pa'k in um henla, chuleh, Zion Thusuak Deceember issue sua kit thei in aki um ziakinle avel in Pa Pathian chu pak in umzing zing taken.*



*Kum leh tha, Ni leh Hunte hi tuiluang gual in a luang zung zung in, kuama le ngak chuam neilo in ama chia ding gual tak in a chia zing ahi. a chia zing zing hun lai in kum 2022 January apat December 2022 sung a hin mihing bangzat hem tiang a chia mangpi ah chuleh mihing bangzat hem in buaina leh haksatna atuakpi ahi ti hi i he chiat un ahi. Nang innsung in atuak chun hema ma ding la hi, ahinla, la insung min atuak lo chun hun chiadan leh hun mantam dan te hi he dawk lo hial ding la hi, zia haw zia ahin mi tampi ten hun leh phat te hi tekse te gen gual mai in ni asuak ngai ah suak, atum ngai ah tum zing him atiu in nithak leh hunthak ten bang ahunpui khawm ah bang bang ahun tuak em ti him him hephalo ahiu hi. Ama bo nangin vang hun leh nite hi a matdan la thiam ding ka hun dawisak hi. A zia chu hun leh nite matdan thiamlo te khan kokit theilo hunte ngaina thak in kisik maleu le changkit ta ngailo ahiu hi, ziagual kisikna leh ngainatna nei kitlo ah malam kipakna ding thil thei ah Lalpa Jesu lam enzing kawm ah lanei kham kham ah lungawi kipian, hunpha neisung ah thabei lo in, mawk um ah um ziang lo in insung mite dingle la*

*thagau lam hinkhua ding gel zing kawm in panthak la hun lak ah insung mite leh kochuam te a ding ah napha lopi tak sem daw k thei ta dingin Lalpa'n hun umpi in hun malsawm zaw ta hen.*

*Kumthak 2023 melmu thei ah, tukum 2022 kum sunga seplo te leh baw llo te semdaw k thei ding in Lalpa'n hun malsawm henla, hatna thak taw hun pia henlang, kichamna Lalpa thupiak gualin mizosia taw kichamna nei ah kuama muda leh hawtchuam nei lo dingin taw Lalpa'n hun malsawm ta hen. Kakipak hi.*

-----

**PATHIAN THUTIAM HUNG GUITUN DAN****Christmass Message****Rev.Dr.Khupkam vaiphei**

Galatia 4:4-5. **“Himaleh, ahun ahung butin phat a khan chu, Pathian in a chapa chu numei ah kipat hun piansak in, dan nuai ah chun a hun sawl lut ah, Dan nuai ah umte chu ama chate I hung hithei na dingun, ei hung tandawk ta ahi.”** Van nuai ah thil um zosia leh mihiam zosia hin hun anei chiat uh ahi. Mihiam te a dingin Pianni a um ah, kichenni a um ah Thini ahung um kit in ahi. Zia gual a chun Gancha chitin leh thilsiam zosian le hun anei chiat uh ahi. Pathian lei leh van leh a sung um zosia siam pan le amihiam siamten apuksan taak ziakun, amau ala themtu Gul kiang in **“nang leh numei hun kido sak ing ka tin, a suante leh lasuante kido sak ing ka tin, zia chun la luchang hithi dup intin, nang in a ak khawmit chu thidup inla, atia.”** (Genesis 3:15). Aban in Zawlnei Isai in kum 700 masang lam apat in ala gen pen **“Zia ziaka chun Lalpa ama ngei chun teptena hun pian tin, Ngaitiam un, Nungak thiangtho chun nau hun vawp intin, chapa hun hing intin, amin ah chun Imanuel ti hung hi ding ahi”**(Isai 7:14) Jesu hung pian ding genlawkna ahi, Zawlnei neu Mikah inle ala milawk dan kha **“Aw nang Bethlehem Ephratah Juda gam ah sang tamtak lakin neu maleh chin, nangma ah kipat in Israel haw vai ei hawmpiak ding Pakhat hung pawt intin, a hung pawtna chu malai ah kipat ah kumtuang ah kipat ahi ngal ah.”** (Mikah 5:2) Bethlehem ah Jesu hung pian ding

mulawkna ala hin ahi. Chutichun, Zawlnei Isai ma in hiti hin ala gen lawk kit ta ahi..”**Tichun, eimau a dingin nau chu ahung piangah, eimau a dingin chapa piak ahia, chuleh, a vaihawmna chu a liangko ah chuang intin, a min a chun Lamdang, Lemguattu, Pathian hat, Kumtuang Pa, Lemna Lal, ti hung hi ding ahi.**” (Isai 9:6) Jesu hung pian ah amin dingte genlawkna ahi. Pu Paul in Galatia mite kiangin 4:4-5 na ala gen pen khu, Jesu Khrista hung pian ding hun leh phat kuama ei mihiam ten hetthei genthei ahi pua, himaleh, hun leh ni siamtu Pathian in ahun tai ati dungzui in ahun ahung tung tan tichun, thu ki genlawk te haw kha diklo um keilo in alengin ahung gitung pan ta ahi, zia chanchinpha Mathai ziak leh Luka zia kin kichian deu in ahun zik daw k tau in ahi. Mathai 1: 18-25; Luka 2:1-20.

Jesu Khrista khawvel in ahung dan hi hung mawk hung ziang ahipuan, Pathian in bangkim ala guansa ahi dungjui in hung tung ahi dan te hi hetsa gual in gel ma le chunle tuchung in avel in ngaitua thak tia, Siamtilbu/Genesis bu apat Zawlnei Malaki bu sung tiang a hin Lalpa Jesu khawvel ah ahung pian ding dan, athawk ding dan leh van akal tou kit ding dan thute akiziak vek in, zia haw kha ahun ahung tun phat in Nungak Mary, nungak thiangtho chungin Hukdampa Lalpa Jesu hi hung kizil ahi, Aman tatna ei siam piak ziak le hukdamna I chan tak ziak unleh, Ama zal in Pathaian taw kicham in akiang tungthei ta ding in ei siam tak zia kin tu hun in ama pianni khua hi lopi tak in kilawm ahi, apian nikhua lawp hi kibawl khial kei lo chu ahi, tukum inle kipak tak in lawmkhawm chiat hitiu in ikipaknau le ilawpna teu

hi athawn ahung chan lo na dingin anuai ahin thupi khat chialna gual in ka hun gen nuam ahi.

Unaute, bangkim hi Pathian in thu ala tiansa leh agensa te ngen hi khawvel ahin hung gitung zung zung ahi gual in, tuhin le ahung tung dingte ama Pathian in Bible ahin ei genzokeita ahi, zia haw hi ngaitua phai tiu in, Jesu Khrist hung pian ding thu kha Juda ten helo ahi puau in, maleh amau tena gual in khawvel hukdam dingpa Lenthak hung pian dan kha kilawm ahilo ziakin atak sang puau in a chung un siatna tung in vangsia a changtau ahi, tuhun inle Ama Lalpa Jesu'n ka umna nangmau le la um theina ding un mun siam in chia ing ka tin ka siam zaw phat le hung kit in nanghaw pui ah hung kit ding ka hi alati ahi. Tuhin ama hung kit ding ngak te chu ihi kit tau in, Juda te gual in la ginchaklo gual tak inle hung kit maithei ahi, ahinla ahung kitna ding ahin taksa ah hung piang talo ding ahi ziakin, ginchak gual leh ginchak lo gual in umta lo ding ahi, bang gual in hung di hi ziang lele, ama ah Ginna taksanna neite bep a dingin hung di ahi zawi, ama ka ging hi ka taksang hi tia ama thupiak zuilo in um ta le chun ahung ni phat le hun hepha talo ding ahi mai hi, ama Pianni khua Christmas nuamtak ah leh kipak tak ah lawmtu chuleh sum bangzat ahem kiseng ah nekkhawmna te hawle pawdawk ah ha pan ma ma khat le la himaithei hi ahinla, ama Jesu melhetlo apiannikhua lawmtu la hi khak ding dawi a umlo ziakin zia Khristmas message hin tukum Christmas diktak leh kipak takah lawmtu hung chang thei ding in simtute zosia Lalpa'n hun malsawm ta hen.

**Christmas ala mangte lakah Ettawn ding khat:** Mathai 2:11-12 na ah, Sualam miching te khan Jesu amu phat ua khan, agoubawm teu ahawng ua, thilpiak te apiau ti imu ah, athil piak teu kha chu aman tawm them umlo chu ahi, Sana te, Begaw te leh Mura te ti ahi. Lalthak ding avak mu chu kipak ma ma in thil piak thupi tak apiak bep ule hilo in Ama Jesu amu tak ziakun, Lengpa Herod thupiak te mang talo in ama kiang lam zuan lo in lam chuam lam in Lengpa Herod umna apel tau in dam leh kipak tak kawm in innlam a zuantau ti ahi, Unau, Sualam michingte Christmas mat dan apat in bang hetdaw la nei em hawi deu in gel tiam in, amau khan Leng Herod thupiak gual in Jesu pianna mun kha va hil kit malam leu Jesu kha atha ding ahitai, amau Sualam miching te khan ahun hilkit malam tak lo ziakua khan lungna ta lua in Jesu pian hun kha tepte in naupang kumni nuailam zosia aban tha ahi, maleh Pathian in Nausen Jesu kha anu Mary leh apa Joseph kiangin Aigupta lam ah nausen zam daw pi dingin ala hil tan Leng Herod khan that kha talo ahi. zia thu ah kipat ahin zilkdawthei ka mu chu, Sualam miching te khan lenglui Herod kiangin bangma vagen kit talo in a umna ziak uhkha ahi, a ziakchu, Nausen Jesu Hukdampa kha tha khak hita le Pathian program chu setan in azaw hita ding, chuleh eihaw asiamsa mihing tele kuama tatna hukdam in ki um thei talo ding ahi, ziagual a chun tulai ah ei haw Christian hung hi taten le Lalpa Jesu ei Hukdampa Lalthak ikisan tak zaw nungua lallui lam tichu gitlo nawpchenna te, khamthei thilte, taksa dawisakna zosiate avel ah va nung lakkit te hin setan kipakna in Lalpa Jesu amau umding pen kha athisak kha sek tau hi ti mudaw leh hetdaw ahi. eimau ah umding thagau thiangtho in



einutsia phatle ikam un bangzat gen in ki thagau misak ma leu hinle Khrist thagau kithisak ta umtalo chu thagau ah hinna ding umlo ahita ahi unau kigel phaitiu, Sualam miching te gual in Lallui lam Herod lam in kile kit ta puai tiu aw, chuti le Jesu eimau um kha hing zing ta ding ahi. tukum Lalpa Jesu pianchanpha christmas lawm nuam chiat thei dingin Lalpa'n a thu ivak kihil teu hi hun malsawm ta hen. Amen, Kakipak hi.

-----

**AW EI HIL IN VANGAM UM DAN  
GAN ANKUANG LEH HANSIADAWL THING.**

Upa Lalboi, Gawtangkawt

Tu Chung khristmas sermon ding kangaihtua lai in jia laa hin ka lung thim akhoi ma<sup>2</sup> Jiang in, la phuak tu lunggil takah Pathian ala kipuanna hi Ama gual Tuk in hethei talou ma leu hin bangtiang ahem bek vak mupi th ei leu hin ti ngai Tua na Lian Tak ka nei hi, Ama hunlai ah ala phuak Dan hile thagau lam ah ala mu thuk Dan hi tulai ah Bible hethiam tamtak te hin le amu phak Lou diu in le ka ging cha ahi, Jia la hin bang gual bep in Pathian hepina leh lopina atak Lang em ti ngaitua khamset ating ahi, I khristmas chanchin uhi Eden akipan ala hia, bangjiaka Pathian chapa hil hial jia khawvel thim tak a hin hunga, ahinna ngei pia hunga EI hung tan ahem iti LEH, Pathian lungthim achun Eden huan akhan ala um jou ahi tai, Siam til ah nupan Masa pen teni Khan Pathian thupiak hung bawtsia ah, themtu thugen gingcha jaw ah, neklou ding thei hung nek ua Khan

khawvel chu HANSIA law in aum tan, Eisialmtu Pathian leh asiamsa mihiamte kijop na Tanta chu jawp matkit ngai in ahung um ta ahi. Pathian in Eden huan ah Pat Adam leh Evi ala sawldaw ni akhan lungna Tak in leh, tukkhuk ah man ah sotdaw hilou in thagum ah kaidaw le hilo in hepi na taw, lainatna nasa Tak taw ala sawl daw ahi, Hiati thei ding pen chu, jia lai akhan Amamaw pen uchu angawn Chang jachak nau selna ding in savun puansil in ahung tuam u ahi, Mihiamte gitlou na in Pathian hepina chu subei thei naisai Lou ahi Dan akilang hi, atou ding ngaihtuana ah savun ah athuam EI puai, Pathian in EI u puan haw sanga hawijaw leh jaw ding asiam thei ma2 in, Himaleh savun puan khel2 in ahung tuam ahi, bangjiaka hem iti leh savun aum ding leh sakhat athi angai ah jia sa chu Amamaw na bangma umlou ah thuak ahi, Savun chu kilipTak leh thisan luang tei2 ding sek ahi, Pathian in jia gan thisan akhan nikhat kalvary Tang ah khros chungacha chapa thisan hung luang ding chu ala mu lawk ta ahi, Alungthim ah jia chu ala um ta ahi, Pathian lungthim achun kalvary chu Lian ma2 ding ahi, Achapa thawk ding Dan jousia chu ala he chian ma2 ding ahia, ngei Hawn lak ah belam no sawllut ding ahi, ti he chian in khawvel gitlou ah puksa chu tatdaw na ding lampi dang umthei Lou ahijiak in ahepina Chun Amachapa hial chu itlou in EI u ading in ahung sawl ta ahi, Khristmas la ila sak Jing sek uh, **“EI AN KIPAK AUM HUKDAMPA HUNG PIANG CHU”** Maleh van mite ka han thil in angai pen u HUKDAMPA khennan la alem ui, ti hin thil tamtak chu EI hil chian kit ahi, Mihiamte adingin vang KIPAK AUM ngei e, HUKDAMPA hungpiang ahi jia in, Angel ten nangu adingin chanchin KIPAK um ka Hun

tun hi ahi, ala ti him ua kipak na ah le ahil chian ding Dan umlou khop ah kipak ting chu ahi, adawngtu te a ding in kipakna himaleh van mipite a ding in achawihawi chimlo uh, akipaknau pen uchuh, lei munthim pen ahin a hung kumsuk ahi, Hukdampa Jesu a ding in lampi nuam ei puai, Zawlneiten avel in Hukdampa hung pian ding chu ala hil luak ua Zawlnei Isai Khan apian ding thu leh athawk ding leh athina ding ala genkhawm pen chu ahi, Ei uh a ding in nausen hung piang in chapa piak in i um tangal un tin ala genlawk ah,( ISAI 9:6) Amin ding le ala genlawk a Lemguattu,Mak, Pathian hat, Kumtuang pa ti ahi. Himaleh,Lal Jesu a ding in lampi nuam bang ma a um puai, thu awina longal in asuk pitin ding dan a um puai, Sualchak Pual in ei uh hiat chian thei ngei ding in, Korinth kouchuam te kiang in "Lalpa Jesu hepina chu, agenthei na jiaka la hung hausak theina ding un,hausu maleh nang haw jiaka agenthei kha la henau"ala ti ahi.(2 Kor 8:9) Zia hin Christmas ahil chian hi.

Apianna ding ala hillawktu Jawlnei Isai ma ma chun, athokna ding kim takin ala zik kit hi.Ama chu tang gawchak ah thai gawchak ah thaichi no kek- mite musit leh pampai in ala um tan;mi lung ngai leh natna dim ahi. (ISAI 53:2-6) guntak in ala sim in, zia gual ah athokna ding kijik masa chu kua dang hilo Lal Jesu ama bep in asuk pitin thei ahi ti hia in, thu awi tak in a hung kipia ta ahi Pual in ala hilchian ma ma hi (Philipi 2:6-8) nan agen hi. Gan ankuang pang lo in Christmas um thei lo ahi mai hi maw, mihing gual a hung piang in ti ahi jing lai in mihingte sang a nem jaw nalai lo ahem? Gan ankuang lawm lawm in ahung

kisial ahi. Hansedawl thing taw hung kijawm ding achun lopi tak ah hung piang thei lo ding ahi, Lei Eden leh Van Lal lukhuk Salem thak aki jawpthei na ding ah Leilawn pawimaw tak chu jia gan ankuang hih ahi thei ala ngai ahi maw, Pathian ngaituana lungthim hih te ah te phak ding hi lo hilchian jaw ding hi lo vang ahi.

Pu RL Kamlala la phuak hi kangaitua chun Pathian thagau in amuchian sak hi chu athuk ma ma mai hi. Aw athuk in asau na e lachitna leh lei hepina thagau khawvel ah gihawi te leh Van miten a genseng puau( HALLELUIYA) Zia la hi asak daw nihin bang gual bep in kipaknan adim tadium, Van lam ah lungthim kawijing tekhan bang gual bep in ala lampi diam uh maw, ziaziakchun, Kipakin ala sadawk maitia, Kiko dawk mai tia, Zia la lopi tak mai thute hi athu in gen in gendaw thaw in Pathian pakna leh chawihawi nan ala mang mawng mawng tia, Zia thugil Tak hi hiachian chiat kawm ah Christmas mang lechun a um Zia tak tak chu hia dawk ngei inla avel in vak sadawk hitiu, Aw ei hil in vangam um dan gan ankuang leh hansedawl thing lei Eden leh Van Lallukhuk Salem thak aki jawp dan hih. ti la hi gel Jing leh sajing kawm in tukum Christmas mangte josia chung leh asimtu te zosia chung in Pathian in athu ka hun jik te hi ei malzawl piak ta hen...CHRISTMAS CHIBAI.

-----

---

**KHAWVEL HUKHIN NA DING AH SIAMTIL APAT  
PATHIAN NASEP**

**Text: Gen. 3:15; Titus 1:1-3, Rom 1:1-2**

P/Pastor St. Lianboi, P.Gamhawi

**THUMAPUI**

Lalpa Jesu Pian hi Bethlehem ah hung kipan ahi puan, ahung guitun na ziak ahi. Jesu hi khawi hung kipan ah ama apat hi khawvel hukhing na, nasep hi bangtin hung guitung ahem ti ala en hitiu.

**A. MIHIAM KISIAM MASANG:**

Bible sung ah thilsiam haw lak ah pang lo thil pathum aum hi. Zia haw chu

1. Vansawlchak gilo, 2. Damun meidil, 3. Diabol (Setan) ahilo leh, thitha iti haw hi ahi.

Zia cheng min pua, chuam chuam Pathum te hi, thakhat chiat hithei ahiu. A ziak chu, Lucifer hin Pathian ahung dek phat in, Pathian in leisiat ahin, ahung nawthak ahi tai, (Is. 14:12-15) zia vansawlchak gilo hi nikhat leh a chungthu tan ah gawtna piakna ding ah, damun hi Pathian in a siam piak ahi. A dik tak a chu damun hi mihiam umna ding ah kisiam vang hilo ahi.

Zia minpua chuam chuam pathumte hi, Genesis 1:2: sung ah thilsiam haw lak ah panglo maleu, akisiam masa hi ding in Bible thiamte pawmdan ahi, a ziak chu, Rev. 4:11 chun, nangma thu siam leh um ngawn ahi ati.

**B. MIHIAM AHUNG KISIAM LEH GITLONA TUNG**

Pathian in mihing a siam te ni, Adam leh Eve Eden huan ah akawi chu, subpoint (A) igen uh Diabol chun ahung thep ahileh amani chun Pathian thu sang in, Diabol thuzawk atak san tak ziak un thep thak in ahung um tau in, Mihing teni chu Pathian tawh chengkhawm thei ahi taklo ziak un Eden huan apat anawdawk tai. (Gen. 3:22-23) zia ziak ahin, Pathian leh mihing chu ahung kikhen tan ahi. (Is. 59:2)

**C. HUKHING TU NUMEI SUNG AH PIANG DING AH THUTEP UM (Gen. 3:15)**

Mihingte gitlona a dim zo in Pathian in Diabol kiang in, a thep thak mihing te hukhing ding ah, Hukdamtu khat hung piang ding thu ala gen hi, zia thutep ala um hi, nung leh hung suak ding thutep ala hi. Khawvel hukhingpu ahung pian ding kigen masatpen na hi Eden huan hi ala hi. (3:15) Diabol kiang ah gen masak pen alahi na mun chu Eden huan ma chu ala hi. Hukhingtu hung pian na ding numei kiang ah ala kigen pet ahin nungak akitipuan, Numei ala kiti zaw ahi.

**D. NAM (Nation) KHAT ALA GUANG HI:**

Khawvel hukhing ding ah Jesu mihiam ah hung piang ding ahi tak ziak in, ahung pian na ding nam (Nation) khawvel ah ala umsa nam haw lak ah khat hiziang lo in, Pathian in nam thak khat a siam in zia chu Israel ahung hitai. Mihing khat ahung pian ahileh, aphung a chang ahiloleh anam (Nation) anei tei ding poimaw ahi. Ziaziakachun, Jesu hung pian na ding nam (Nation) chu Pathian in Israel kiti hi ala guan ahi. Jesu hi leisiat

ah taksa a um sung achun ama nam(Nation) Israel apat nam siam daw na ding in a nuai ah mi haw hi ala guang hi.

### **E. ABRAHAM ALA KO HI (Gen. 12:1-4)**

Pathian in Israel nam khat siam daw ahi na ding in Abraham ala ko hi. Zia gual hin ako hi, "La gam leisiat nusian" a ti piak hi, a ziak chu, gam thak khat Canaan gam kiti chu apiak ding ziak ahi. Chuleh, "La phung la chang nusian" atikit hi. A ziak chu nam thak khat tu masang ah ala um khalo hial Israel kiti hi Jesu Christa hung pian na ding ah a siam nuam ziak in Abraham ako ahi. Nam lian tak ah siam ding ahi atikit hi, (Gen. 12:1-2) Zia nam chu tuhun ahin, Christa taksang zosia ahung hita ahi. Christian ahung tam hi ahi, nam liantak kitina chu.

Chuleh, Abraham chisuan dik tak chu taksa acha te sang ah ama taksan gual ah taksang haw zawk hi ahung hitau ahi. (Is. 54:1, Gal. 4:27-31; Rom. 9:6-8)

Pathian in Abraham ako na hin, Jesu pian na ding bep hilo in, (Jesu) taksang hawn chanpha a chan diu dan leh, taksan na zal ah Pathian chate leh nam tel a hi diu ziak etsak le ahi, taksa acha Ismael sang ah thutep cha Isaac zawk tel ahi gual in, Abraham bang ah Christa taksang zoaia chu Israel diktak ahiu ti suklat na ahi. (Rom 4:13-14, Gal. 3:29)

### **F. JESU PIANNA DING GUI MI A TEL CHUAM:**

#### **1. Ismael sang in Isaac jawk a tel hi.**

**Sim ding: (Gen. 21:12, Rom. 9:7,8)**

**AZIAK:** Abraham banna Jesu hung pianna Abraham gui chu Ismael hiding dawl ahin, aziak chu ama hi chapa lianpen ahi. Himaleh, Ismael chu taksa dan anei ahin, Isaac chu, a chawm lam in gen mai hitiu, Pathian thutep sa ahi ziak in tel ahi zawi. (Gen. 21:1-7)

## **2. ESAU SANG IN JACOB ZAWK A TEL HI:**

**Sim ding: (Num. 24: 17; Rom 9:12; Gen. 25:23)**

**AZIAK:** Isaac in chapa ni, Esau leh Jacob amani hi apiangkop ahiu, chiana dan achun, Esau apat kisiam ding dan ahin, himaleh, Pathian in Esau hilo in, anaupa Jacob jawk ala tel hi. Zia thu hi Bible thiam haw suidan in, nung leh Pathian in amite Israel te sang ah Gentile te zawk ama hukdamna huang sung ah ahung lut ua, Israel lalgam kawt akhak ah, Gentile haw ding ah kawt ahawn piak ding ti etsak ahin, zia chu, Kochuam hung kiphu daw ding etsak na ahi tin Bible thiam haw apat mudaw ahi. (Matt. 21:43)

## **G. JESU HUNG PIAN NA DING MI KHAT ALA GUANG HI: (Gen. 3:15; Is. 7:14)**

Jesu hung pian ding kigen masapen chun Numei sung ah piang ding in akigen hi, ahin aphant ahung nai deu deu phat in, zawlnei Isai in ahung genchian deu kit in, numei kiti apat in Nungak Thiangtho tin ahung genchian tai.

## **H. JESU HUNG PIANNA DING KHAWPI KHAT ALA GUANG HI. (Matt. 2:1-2)**



Pathian in Khawvel Hukdampa hung pian na ding in ala guan chu Bethlehem khawpi ahi. Zia khawpi Jesu Christa pianna munding ah dawisak ala chan hi, Zawlnei Micah kam apat Jesu pian masang Kum 700 vel achun ala gen masat ahitai. (Micah 5:2)

### **I. JESU PIAN HUN AH, GOVT. KHAT ALA GUANG HI.**

Rom Government hi Zawlnei Danial in lalgam li tinna Jesu pian hun lai leisiat vaihawm na ala chang chu Rom Govt. hi ahi. Zia hun lai ah Sahiam li ala kiti kha Babylon lalgam Medo Persia lalgam, Greek lalgam leh ali tinna Rom lalgam hi ahiu. (Dan 7:7) Chuleh, paukhat ala mat uh chu Greek pau ahi, zia pau hi Jesu pian hun lai ah, Khawvel mi zosian ala thawthei pen uh leh chanchinpha ala kitangkopi na pen ala hi tin Bible thiam haw apat het ahi.

**ACHAINA:** Suapite haw atawpna igen nuampen uh chu, Pathian in kum tampi lut ah kidang tak ah a thil guan Mihiam tampi mangcha hukdampa hung pianna ding gui aguan te hi nang le la chang na diam? La lungthim gobawm te hawng ah chibai buk din la kisa zo nam? Ki ngaitua in, Pathian in, chit leh thiam zia hausat zia leh genthiam zia in mihiam te ana sem ding in atel pua, akipia dawk haw zawk ala mangcha sek hi, Mary ngei inle Vansawlchak hiatna ngei in, lagen gual ib ka chung in tung taken ati dungzui in Jesu ama apat ahung piang ta ahi. (Lk. 1:38) Jesu pianna ding phung gui Judah apat dawisakna a chantheina hi alungput/lungthim Jesu nasep tawh akituak zia ahi, eimau le dawisakna i chan thei na ding un, Jesu Khrista

Simeon gual ah lawp chiat thei ding in Lalpan athu ei malsawm piak ta hen.

-----

## **KHRISTMAS LA MANG KHA TA EM?**

Rev. Liante

Khristiante a ding ah chun Khristmas hi kum sin ah ki mang ahi ziakin, a kum upadeu te chun Khristmas a mang tam ua; a naupang deu te chun a mang tawm mai uh ahi. Ahinla, kum tamtak Khristmas mang ta ngal ah, thagaulam ah bangma phatchuamna nei diak lo te chun Khristmas a mang kha nai puau tina ahi.

Khristmas matdan hi jat chuam chuam a um hi ti a kichian a. Zia te lak ah chun atângpi in ei gam ah Khristmas matdan khenkhatte ah kipat hin nang in bang gual in la mang em? Ahiloleh, Khristmas hi a mat di gual tak ah la mang kha ta em? tiin a thaktakah i kingaitua chiat diu a pawimaw hi.

- 1) Khristmas hi kumtawp/ pawltak a hia, ziaziakchun lekhasimte leh lonasemte a ding ah le chawl hun/ hun awng ahi zia kah gualsiak kidemna (sport), ahiloleh nunnawp mai ah la mat ahi em?
- 2) Khristmas hi van thak ah kivanna ahiloleh kicheina mai ah la mat ahi em?
- 3) Khristmas hi thilpiak ki piaktuana mai ah la mat ahi em?

- 4) Khristmas hi aksi lim, Christmas tree leh disco lights chuam chuam ah inn leh biakinn cheina mai ah la mat ahi em?
- 5) Khristmas hi insung mi, lawi leh pai leh kochuam mite kim hun ahi zia kah lemchâng ah kipawlkhawmna/kimutuana mai ah la mat ahi em?
- 6) Khristmas hi inn leh biakinn ah sa nekna ah iloleh luaithena mai ah la mat ahi em?
- 7) Khristmas hi Hukdampa Lalpa Jesu pian ni ahi zia kah lunggiltak ah kipakna leh thagau ah limna zia kah la mat ahi em?

I het zing sau khat, kochuam khat ah Khristmas a mat uh nuam a sa bek bek ua, mi khat in, “Ka Khristmas mat uh a nuam talua, Jesu pian lam lam le ka he phak ta puau” a ti hi thil khawk tak, lau um tak leh daw i um lo tak chu ahi! Zia gual ah thu gen thei te chun Khristmas a mang kha kei puau tina ahi.

Kum khat sung ah biakinn kai kha lo te le Khristmas sung bek ah biakinn a kai ham ham nak ualeh, Khristmas hun ziang ah le biakinn kai diak lo te sangin a phazawi ti mai hi tiu in. Ahinla, local committee in member khenkhat biakinn kai khak lo zia ah tuanvai ding ah a guat nawp deu teu haw, adiak in zu dawn pawl te hin chu Khristmas hi luaithena ah a mat deu pen uh tina ahi mai ding ahi.

Khawvel ah mihing khat ah hung piang hi ngal ah, a mat ding gual tak ah Khristmas mang kha lo te khel ah lungsiat um di a

um lo uh ahi. Lalpa Jesu Khrista hilah mi zosia a ding ah hung piang ahi ngal ah (Luka 2:11; cf. Johan 3:16 en in).

Tu kum 2022 Khristmas bek ah hin Thagau ah mang chiat thei ding in simtu Lalpa'n hun malzawl ta hen.

-----

## I LAKUN A HUNG UMTA

### **John 1:14; Phil 2:5-11; Thup 21:1-4**

Rev K Lala, Salem Veng.

Pathian mihing a hung chanthu hi khawvela thiltung mak zosia sang ale mak a hi. Ei uh mihiamte'n a pawimaw na leh a phatchuam na ihiat uh a pawimaw tak zet hi. Zia gual ah Pathian mihing a hung chan thu hi Greekte, Hindute, Muslimte leh Communist te chun a awi tawplo uh a hi. Greekte pathian Zeus, Hera, Poseidon, Demeter, Athena, Apollo, Ares leh Dionysus te hi chu mihingte tawh kizawpna a nei ding in a gingcha theipau ah, panpi a ngai hun ua panpitu gual bep in a hiau. Hindu pathian Krishna hi le zia tawbang a chun a ngai uh hi in a lang hi.

Naupang khat anu hospital ah nau neidi ki admit chu a zui guat leh a Pa chun a phal pua, naupang kiang a chun "Bawi, Pathian in nausen dawu um tak hung peding ahia, inlam hung pui tung di kahi." a tia. Nausen chu inlam a hung tung di chu zia naupang chun a la ngaklel ma ma ziang ah. Ti chun inlam a hung

tun phat ua chun, zia naupang chun nausen chun a dawn ah, a lupna ding mun ah a sial zaw nung in a kiang ah ava ding a, “unaunu la hetmil masangin Pathian chu bang gual ahi em ti eihil vak tia.” ti in a dawng tamai ah. A pa’n Pathian in nausen hung peding ahi ati kha a hemil pua, nausen chu Pathian kiang apat hung gual ah a ngaiziak ah zia dawtna chu a dawt ala hi.

Pathian chu banggual ahi em? Pathian chu banggual lungthim pu ahi em? Bang ahem a dawigual chu? Bang ahem a dawilo lam? ti te i henuam ma mau ah. A chapa Jesu Khrista, Pathian mihing ah hungpiang, Pathian hi na zia zosia eihil ding ah khawvel ah hung a hi. Jesu’n, “Kei eimu chu, Pa mu ahi.” ti’n a gen hi. (John 14:9)

Zawlnei Isai hunlai, Jesu pianma kum 700 BC vel a khan, Juda leh Israel lalgamte chu a gam vaihawmna’u a buaiten ah, Lalte’n Pathian Biakna kiheisan in, namdang pathian aho ua. Mipite’n le lalteu nungzui in, milim pathian aho tau ah. Ziate ziak achun gamdang lalten gâl a hung zotau ah, a hung sawisa tau hi. Zia hun lai achun, lungkham leh beidawng in hukdawktu di thangko ma leu Pathian in aki heisan tak thu, zawlnei Isai mang in, zilgaina leh sual sim ding ah chialna thu ahun puang sakta. A lal uh Ahaza kiang achun, “Nungak thiangtho khat gai intin, chapa hing in tin a min in Immanuel sa’n au.” (Isai 7:14) ti thu a hiltai.

Zia thutiam chu Isai in bung 9:6-7 a khan a sun zawm kit ah. “Ei uh a di’n nau ahung piang ah chapa piak in i um tau a,”

ti'n agen hi. Himaleh Israel gam ahem, Juda gam ahem, khawvel ah banggual gam hita leh kumtuang daiding him a um puai. Pathian in Ama Chapa ngei chu, khawvel pumpi vaihawm ding leh Pathian dawigual ah gam tungding ding ah A Chapa a hun sawl ahi ngal ah.

## **1) PATHIAN DAWIGUAL I HIAT NADING UN I LAK UN A HUNG CHENG HI:**

Lal Jesu ziltalna chanchinpha bu ziaktuten azik uh hi gun tak in sim leu hin, Pathian thu'n a gen tamtak, Pathian lungthim apuang dawak ah. Diknate, phatnate, felnate leh a dang dang Pathian dawi dante chu ihethei uhi. Mihing tēna, fel leh dik chun Pathian aki paksak zo talo ahi. Mihiamte mani masial na te hin Pathian kipaksak sang in i suklung nat zaw ahi. Mihing chu kibangchiat leh kilungsiat tua tak ah khawsa khawm ding ihui ah. Pathian in mihingte haksat leh gentheina te a ngaithâk zia suklat na in, damlote a sudam ah, mithite a kaitho ah, liangvai gentheite panpitu apia. Zia thute hi guntak in Thuthungluite sim leu hin muthei vek ahi.

Pathian zawlneite'n, Pathian Thu a puan te'u chu a guitung zel ah aki tuak zel hi. Pathian Thu awi ding ah mihingte ahilnau thu zosia kha, Pathian Chapa ngei in, khawvel ah hung kum in a hung genta ahi. Zia khawvela i um lai ua a Thu i awilo uh chun, thi nung ah sual simna di hun um lo ding ahi. Mihaupa leh Lazar thawnthu agen akhan ahuap khawm ta ahi kha. ( Luka 16:19-31).

## **2) KUMTUANG HINNA INEI NADING UA MIHING AH HUNG CHANG A HI:**

I hiat nawn zing sek uh himaleh awi hak i sak sek u chu, Lal Jesu hi kumtuang hinna i nei na ding ua, khawvel ah hung ahi thu hi ahi. Ama ging ah, Ama chu Lal leh Hukdampa ding ah pawmte zosia te'n kumtuang hinna anei u hi.

Kumtuang ti hi sâwtzawng tina ahi tawp mai ah. Apatna chu a lulna te leh a nawpna te ahi. Thi nung chau ah kumtuang hinna nei ding ah i ngai khel ahin zia khawvel ah i damlai hun sung ua hin le Pathian chapa Jesu Khrista piak hinna hi ama gingtute chan ding ahia, lungthim sunggil lam ah a sepdân chu; kipaknate, lungawinate, lungmuanna te hi ahi. Hinkhua ah a khawidân chu diknate, hatnate, hansan nate leh ngaiphat nate ahi. Zia tawbang hinna chu neita in iki hiau em? Pathian chapa mihing ah hungchang chun zia tawbang hinkhua hi peding in khawvel ah hung ahi.

## **3) I THAMUAN NADING UN ILAK UN A HUNG UM AH:**

Bawsiat na ziakin khawvel ahin gâl lau in i um ua, i mihing chanpi teu tawh ki ngiktua zing mai in i um tau ah. Ziabep chule hilo in thilsiam dangte nasan le a lau um tau ah. Natnate, lungngaina te, thi nate, basapna leh beidawwna te ziak in mihingte hin thamuantu i ngai ua. Van apat in ei hukdam dingin Lal Jesu khawvel ah ahung hin Pathian chu naicha um

gual in, ama i chial phât sin leh i ko phât sin ua hin ei thamuan thei hi ti a latsak hi.

Vak chu thim lak ah ahung ah a salvak ta,” ti’n (John 1:5). Lungngainate, lungkhamna te, lusunate’n i thinlung uh thim gual ah a luadim te chu sunvâk ding in khawvel ahin Jesu hi hung ahi. Ngaitua thak a pawimaw khawp mai hi.

#### **4) AMA I ET TAWN DING UN:**

Pathian Chapa, thu chu tisa hung chang in ettawnding eihung kawku mu a, zia chu Paul in Philippi (2:5-11) te kiang ah agen kha ahi. Ziate chu, Pathian tuk a tup pua, suak gual ah hung kisiam in, a ki ngaitawm ah, a thu awi zia in Kross ah a hung thi. Zia thu awina hinkhua hin Pathian mite umdân ding pawimaw tak ei kawku hi. Paul in zia thu a genlat na zia khat chu; Philippi Kochuam mite lak ah, kituaklo na a um ah, Euodi leh Suntuki a genlat te hi a kilâk deu te hi’n ginchak ahi (Phil 4:1f). Thagau lam ah i thuneina sangzaw hi nate kichu ihi mai thei ua, Lungsiatna te, kilainat tua nate, kikhawtuana te, kihepina te, nei ah kithugual ah lungthim munkhat neiding in Paul chun a tilkhau ahi. Paul in a zilgai na hi mihingte’n haksa i saksek uh chu ahi. Ki ngaitawm leh thunuaigawl te hi tulai politics leh thuneina kichuna khawvel a hin haksa i sau hi. Suanlam in i mang ua, khawvel ah um nalai i hui itisek ua. Himaleh Pathian chapa mihing hung chang Jesu Khrista chun thil hitheilo ah suanlam a i nei sek teu hi, a ma ngei in mihiam in ihi thei zia ahung latsak a hi.



Johan Thupuan 21:1-4 a khan “Pathian Biakbuk chu mite lak in a hung um ah,” tithu aki mu. Zia hin Pathian mihing ah ahung chandi thu hi ahi. Israelte thalek ah a khualzin lai ua khan Pathian in sun ah sum in, zan ah mei in apuisek ah. Zan ah puan-in akaipal ua, a chawlna’u ta phawt ua khan Sum in alia khu sek ah, maleh Pathian ngei chu i lak un a hung chengta, a phawkbawk a hunsa, i invengpa gual a hung hita. Ama chu i kiang nai ah muphâk leh kophâk in a hung naitai tina ahi. Ziakziak a chun bang hun ale iko maithei ding un a naizing ta ahi.

Kochuam mite hin Lal Jesu gingcha chiat in, i invengpa’u, iphung- ibêpa’u, ichi leh nam ahi hi hezing in, ithil bawlna zosiau ah leh ihun matna zosiau ah pansak hitiu. Lemguattu mak, Pathian hât, thilhihthei leh zâmngailo, kumtuang Pa, bangtik lai ale umzing, Lemna Lal chun ei uh soal leh gilo zing himaleu hinle, kilemtuanna eisiampiak ah, i sualnateu sim ah, thupha ichawi ua chun ei ngaidam thei zing ahi ti ihiatmil lo ding uh a hi.

I lak ua a um ta ngal ah. **Amen!!**

-----

## Elected Upa Training report

A chiata tarik 25-26, November,2022 sunga khan Upa dingah kochuam in ateldawte a thani tinna ding in Hilltown, RCG center church HQ mun in traingna chu neizaw ahikit tai. Teldaw ah a um nau kochuam te ahile (i) S.Kanan apat Elected Upa Nekkam (ii) P.Gamhawi apat Elected Upa Minlian (iii) Kangvai apat Elected Upa Lalthamuan (iv) Hiltown apat Elected Upa B.Athang leh (v) Elected Upa Lalthang ahiu in ahi. aban in December thasung khatvei neikit ding ti ahi. Limlak khenkhat te cover page in kawi ahi.

-----

### **2021-2022 kum sungah Government leh Private ah sepna leh promotion muthak te kipakpina maicham siamna report.**

By: Executive Secretary

A chiata tarik 2<sup>nd</sup>-December-2022 (Friday) ni khan mission ten kum 2021-2022 kum sungah government leh private company ah sepna leh promotion muthak te kipakpina maicham siampiakna Youth Hostel, Khumanlampak, Imphal mun in nei ahi, ziagual program kisiam hi RCG pawlpi in bangtik inle ala kibawl khanai lo bawl zel dingah phatsakna CEC meeting na in akinei zia in zia gual hun hi siam ahi. Ziani hin government ah sepna neite mi 9 (kua) ahiu in zialak a chun sepna muthak mi 4 (Pali) ahia, Promotion muthak mi 5 (Panga) ahiu in ahi. Private

company ah semte ahiu le agawm in mi 15 (sawm panga) ahiu in, zia lak a chun sepna muthak mi 12 (sawm pani) ahiu in, Promotion muthak mi 3 (Pathum) ahiu in ahi. Ziani hin sepna nei mun chuam gamchuam ah umte leh hung pawt theilo atam ziakun mi 10 ahung pangthei un kipak a um hi. Program kimatchak dan ahile, Lasa dingah special invitees in Pa Hauliansang Bewlahland, Saikul Idol 2022 ah 1<sup>st</sup> runners up apang in, aban in hun mapuitu in Upa Songlianhang vaiphei apangin, Rev.Liante'n hunlatna anei in, Upa S.Haulal Moderator in program kimatdan suklatna leh tilkhauna thu agen in, Rev.Dr.Khupkam vaiphei in sepna leh promotion muthak te a dingin Maicham siamna leh Malzawl dawtpiakna anei in, Imphal RYF ten sepna leh promotion muthakte pakvui awsakna ahun nei un, sepna muthak ten kipak thugenna aban ban in ahun nei un, Upa Jangthang in kipak thugenna anei in, Program khakna Rev.Pauneu in anei zaw in, Kipakna ankuang kisiam te latna Pro/Pastor St.Lianboi in anei in, ahung khawm mipi ten annak zaw in kipak takin innlam zuan chiat in kikhen na nei ahitai. Lopina lalpa I piau in ahi, ziagual ahin sepna muthakte kipakpina siam zel thei ding in I lak un sepna muthak hung punbe zel thei dingin Lalpa'n imau ei pui zel ta hen.kakipak hi. RCG Damsawt hen. Ziani ah limlak khenkhat cover page in kawi ahi.

-----

---

**PAUCHAPNA HETDINGTE**

1. Kochuam tin ah vaihawm thunei ten Pathian thagau pawlna nei kawm ah hun vaihawm ua numei naupang atek akhang in tukum Christmas nuam tak leh kipak pum ah mang chiat thei ding in pauchapnan kihetua chiat hitiu.
2. Tuchungah kum 2021-2022 sungah sepna leh promotion mute ziaka kipakna maicham akisiamna te I hung phat chuam piu ah, tunung inle amau gual ah sepna muthak leh promotion muthak akitam zel theina ding in pauchap zel hitiu.
3. Gamthim salvak dingah missionary na isepnau te chawlo ah malam kinepna neizing kawm ah ahat zaw diak ah pan ilak thak zel theina dingun.
4. Pawlsungah thagau gam suhat thei ding Revivalpu ding pa fel leh gin um imu vak thei na dingun.
5. Manipur board ah zillai class A pat Class Nine tiang ah kumtawp exam abawl zing lai un lawtin na hawitak ahun nei chiat theina dingun.
6. Pawlpi sungah sukdam theina leh mulawk theina thilpiak dawng ten Lalpa lunglam leh kipakna ngen in ahun sep dawu ua ahun mu dik zel theina dingun.
7. Theological college ah simlai inei sun sun ten tawm ngai ah ahun zil zaw theina dingun

---

**H E T S A K N A**

Mimal kua tawbang Kochuam sungah sawm ah khat piatheilo, chuleh Zion Thusuak lakman hun pia nuam ten anuai ah RCG Bank account number leh Bank min chuleh IFSC number kipia a hin hun thawt thei inlau ti in ka hun hetsak ui. Editor Zion Thusuak Board.

- ❖ Account Name: Revival Church of God
- ❖ Account Number: 11343704608
- ❖ Bank Name: State Bank of India
- ❖ Bank Branch: Churachandpur Main branch
- ❖ IFSC: SBIN0006182
- ❖ Branch code: 6182
- ❖ MICR Code: 795002504

**ZION THUSUAK PATRON MEMBER TE**

- 1) Elected Upa Lalpthag, Pakeng veng
- 2) Nu Niangneu, HQ Veng
- 3) Nu Lily, T.Munjang
- 4) Nu Samboi, Vanghoiphai
- 5) Pu GL Muana Neitham, Gochinkhup veng
- 6) Upa K.Kama, HQ veng

- ❖ Patron members kum 3 (thum) 2020 apat Rs 1,000/- hita ahi.
- ❖ Life member dingin 5000/- ahi.

-Editor, Zion Thusuak Board

-----

**Collector/Magazine Agent:**

<b>Sl. No.</b>	<b>Min</b>	<b>Area</b>
1	Tv. Douminlun	Hilltown
2	Tv. Lalroman	T. Munjang
3	Pa Paelim	Kangvai
4	Upa Tongjang	Imphal
5	Upa Khailiankham	Nakhujang
6	Upa Manglun	S. Elimphai
7	Upa Liankhai	S. Kanan
8	Pa Mangminlun	Gawtangkawt
9	Upa Nekpu	Jordanphai
10	Tv. Hauginlian	Bewlahland
11	Upa Mamang	Mualkon
12	Pa Ts. Boipu	Mantripukhri
13	Pa Lenghau	Vanghoiphai
14	Pro. Prastor Lianboi	P. Gamhawi
15	Upa Lalla	Vaiphei Veng

-----



Elected Upa te  
Training pet ah  
ann nekpel limlak



Elected Upa  
training a pangte  
sia limlak



Elected Upa te leh  
Zilsaktute  
(Teachers) limlak



2021-2022 kum sungah Government leh Company ah seppa leh promotion muthak te maicham siam piak ni ah hung pangthei te limlak ahi.

## BOOK POST

RNI Reqd. No. 34293/80

To,

.....

.....

Stamp

*If undelivered please return to:*

The Editor  
**ZION THUSUAK**  
 RCG Head Office  
 Thangzam Road, Hilltown, Churachandpur, Manipur  
 PIN – 795128, P.O. Box No. 91  
 Email: [rcgmission@gmail.com](mailto:rcgmission@gmail.com)  
 Website: [revivalchurchofgod.org](http://revivalchurchofgod.org)  
 Contact: +91 9612652209 (Exe. Secy.)